

Dr M gagal yakinkan Agong selepas perjumpaan lebih 1 jam
Free Malaysia Today
Okt 5, 2016
Khairil Ashraf

Bekas perdana menteri itu yang berjumpa lebih sejam dengan Agong pada 15 September bagaimanapun enggan memberikan butiran lanjut.

PUTRAJAYA : Tun Dr Mahathir Mohamad mengakui tidak dapat meyakinkan Yang Dipertuan Agong Tuanku Abdul Halim Mu'adzam Shah supaya Datuk Seri Najib Razak meletak jawatan sebagai perdana menteri selepas mengadakan pertemuan pada 15 September lalu.

“Agong ajukan soalan kepada saya tentang peruntukan undang-undang dan perkara lain, saya jelaskan tetapi di akhir perbincangan saya tidak dapat yakinkan baginda untuk bertindak (supaya Najib meletak jawatan,” katanya pada sidang medianya di Yayasan Kepimpinan Perdana hari ini.

Pada 15 September lalu, Dr Mahathir menghadap Tuanku Abdul Halim bagi menyerahkan 1.4 juta tandatangan mendesak Najib meletak jawatan.

Dr Mahathir berkata Tuanku Abdul Halim mengetahui niat sebenar perjumpaan itu dan berkata langkah yang diambilnya tidak bertentangan dengan Perlembagaan Persekutuan.

“Apa yang kami inginkan tidak boleh diteruskan, kenapa saya tidak boleh beritahu. Mungkin sebab Agong fikir baginda tidak ada kuasa. Tapi kami tunjukkan baginda ada kuasa,” katanya.

Beliau berkata, Tuanku Abdul Halim juga tidak menyatakan langkah Deklarasi Rakyat bercanggah dengan Perlembagaan Persekutuan.

“Saya terangkan kepada Agong, kita sepatutnya mengadakan undi tidak percaya tapi dia (Najib) ada majoriti, jadi kami tidak boleh kemukakan undi tidak percaya,” katanya.

Dr Mahathir berkata beliau mengutus sepucuk surat kepada Majlis Raja-raja bagi mempertimbangkan langkah Deklarasi Rakyat kerana Mesyuarat Majlis Raja-Raja ke-242 akan diadakan pada 11 Oktober.

“Kita akan tunggu sehingga mereka (Majlis Raja-raja) buat keputusan. Selepas itu kita akan fikir tentang apa yang akan kita uruskan dalam meneruskan usaha kita untuk singkirkan kerajaan Najib,” katanya.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/highlight/2016/10/05/dr-m-gagal-yakinkan-agong-selepas-perjumpaan-lebih-1-jam/>